




89

4° S

169

RESER





N. 169.

~~S. 138~~³

S
169

38

(Riserre)

S. 169

Ex Libris ludouici le Vasseur

Apr. 889

5 pièces ou mémoires
de Guy de la Brosse
contenant son projet
de construction d'un
jardin pour cultiver
les plantes médicinales
vers 1636 ou plutôt
sans ind. de l. m. d.



A
MONSEIGNEVR
LE TRES-REVEREND
ET LE TRES-ILLVSTRE
CARDINAL,
MONSEIGNEVR LE CARDINAL
DE RICHELIEV.



MONSEIGNEVR,
Estant nommé au Roy, par Monsieur
Heroard son premier Medecin, pour
auoir la charge & le gouuernement du
iardin Royal des plantes Medecinales
que sa Majesté entend estre construict
en l'un des fauxbourgs de Paris; & de
la Sur-intendance duquel elle luy a faict don: C'est à moy
à poursuiure l'edifice, & à diligenter l'ouurage; mettant en
evidence, au plustost de mon possible, la besongne que l'on
m'a commise. Que pleust à Dieu qu'elle dependist de mon
seul pouuoir! ie fay vœu au Ciel que ie la porterois à telle
perfection, que nos voisins auroient sujet de l'enuier, &
nos suiuias de l'admirer. Mais ma petitesse me liant les mains
m'empesche de voller au ciel; & veut que i'aye recours,
pour y trauailler, à ceux sur lesquels, comme de tres-excel-
lentes estoiles polaires, tourne le firmament de l'Estat Fran-
çois: afin qu'aduertis du merite de l'entreprise, ils influent

12

leur faueur & leur pouuoir pour son accomplissement. D'entre le petit nombre des Esleus, releuez par sa Majesté à cet honorable degré, il me semble que vous tenez la plus eminente place; & que c'est à vous (Monseigneur) à qui je doibs adresser ma tres-humble priere. Tant de rares qualitez qui vous rendent vn peu moins qu'Ange, vn homme adorable, voire vn homme-Dieu, ainsi que les Sainctes Pages nomment le prudent; me font asseurément croire que je ne me deçois point, & qu'appuyé de vostre faueur, que je donneray vne heureuse main à ce trauail.

Je sçay asseurément, que ceux qui ne cognoistront ainsi que vous, que la vie se peut prolonger par le secours des Plantes, ne se porteront aisément pour nostre dessein, voire y pourrôt resister: portez à cela ce croy-je par deux opinions assez receuables à ceux qui ne les considereront de près. La premiere, parce qu'ils ont le sentiment commun avec quelques Philosophes, de pëser que c'est en vain que nous desirons de tousiours viure, & contre cette vieille maxime; que Dieu & la Nature ne font rien in-vtilement, puis que nous ne le pouuons obtenir, & que nous sommes mortels. L'autre en ce qu'ils asseurent que nos iours sont comptéz & qu'il ne s'y peut rien adiouster, qu'ainsi vn tel dessein est superflu.

Mais j'ay à repartir à ces deux obiections. A la premiere je dy, que s'ils sont Chrestiens qu'il leur doit souuenir, qu'ayans esté crééz en vn estat pour tousiours viure, que nous en sommes seulement descheus par nostre erreur, que pour cela, cette fin de nostre creation antée dedans nostre chair ne s'est point perduë: au contraire, que nouuelle esperance par nouuelle promesse rappelle insensiblement le resouuenir de cet estat, & nous faict simplement balancer entre la crainte de la punition eternelle de nostre erreur qui

ne va pourtant au non-estre absolu, Et l'esperance du retour à la grace pour estre immortels: que cependāt la chair souhaitte la longue & saine vie temporelle, comme image de la future. Le desir nous en est si naturel, que nous n'auons pas plustost respiré le doux air de la vie, ny ouuert les yeux au iour, qu'elle nous plaist; mesme auant que l'entendement recoiue les objects par les sens; vne faculté naturelle, vague en nos membres encores tendrelets, cherissant la vie & apprehendant la mort. Et quand l'aage requis au iugement a perfectionné ses organes, ayant senty que la vie est tres-bonne, & qu'elle nous empesche apparemment, le retour au non-estre, nous la souhaittons longue & saine montans de degré en degré la plus excellente fin de ce souhait.

A l'autre je responds, que les promesses de Dieu ne sont point fauces; il promet la lōgueur des iours à l'obseruateur de ses commandemens, voire à celuy qui honnorera ses pere & mere: l'effect doibt estre allongé & racourcy selon son pouuoir, car la promesse est conditionnelle: doubter de cela c'est viure sans ame, & ignorer que la vie de l'homme est mesurée par la seule volonté diuine, laquelle donne la puissance au sage de porter en sa main droicte la santé & la longue vie, & en sa gauche, la gloire & les richesses infinies.

A ces solides raisons je joindray encore, que quand la vie ne se pourroit prolonger oultre le terme qu'ils s'imaginent luy estre assigné, qu'au moins en sa duree se peut-elle acquerir saine par le moyen des Plantes; ou la Medecine qui nous l'assure ainsi, est vne science friuole, & eux ineptes qui s'en seruent: Leur forme de viure tesmoigne pourtant qu'ils desirerent la santé; mais, à guise des friands paresseux, ils voudroient tenir le delicieux morceau que leurs pieds desnient.

4

à leurs mains, & leurs mains à leur bouche. Car encore que parmy le grand cahos des pensees embarassant le iugement humain, elle soit le plus frequent souhait, si est-ce que l'on traueille le moins à l'acquerir; l'on court plustost apres les voluptez, l'Auarice & l'Ambition, les ennemis du repos de l'homme & de sa santé, qu'à la recherche de ce qui luy rendroit la vie douce; ceux-la qui en sont atteints ne s'apperçoient que hastans le pas à la suite de ces maladies du sang & de l'esprit, ils deuident avec beaucoup de vifesse la fusée de leurs ans, & attrapent la mort; se trouuans au bout de la carriere sans auoir considéré que tant de riches moissons les vnes sur les autres entassées; ces hōneurs & ces thresors que recelent leurs Palais reluisans d'or & d'azur, les ont approchez du tombeau & desrobé vne bōne partie de leurs meilleures années, qu'arriuez à la fin ils voudroient donner toutes leurs cheuances pour auoir la longue & saine vie d'un païsan qu'un pauvre toict met à couuert.

Mais vous (Monseigneur) qui auez vne parfaicte cognoissance de la bōté & necessité de la saine & lōgue vie; qui scauez avec les Theologiēs & les plus entédus Philosophes que la pire cōdition de l'estre, vaut infinimēt mieux que le non-estre: C'est à vous que j'ay recours. Car je pourrois dire, que ce seroit en vain que vous auriez la pensée de la saine & lōgue vie, si vous ne fauorifiez les moyens de sa recherche par l'establissement du Iardin Royal des Plantes medecinales; & si vous ne vous efforciez de le porter hautement contre ceux qui voudroient empeschier le germe de ses Plantes, mesme auant qu'elles soient en terre: Parce qu'il ne suffit pas pour l'acquisition de la vie lōgue & saine, de scauoir que toutes choses dependēt de la Disette & de l'Abondance; que la Medecine selon le sentiment d'Hypocrates, soit seulement addition & subtraction: Ce sont termes trop

generaux pour d'eux seuls tirer telle vtilité; & quoy qu'en
expliquant ces termes, on les diuise & sous-diuiſe en leurs
parties, pour rencontrer les loix de bien dresser l'ouurage;
ce sont neantmoins des preceptes inutiles sans les estoſſes &
les outils: les Plantes sont les vns & les autres, puis quel-
les sont les vrais suppoſts des premieres & secondes quali-
tez, & les matrices des troisiemes.

Outre cela, ce n'est pas assez de guerir les maladies, ny de
les preuenir; ces deux intentiōs en la Medecine sont belles &
tres-excellētes, mais celle de la Prolōgation de la vie defaut
à ses preceptes; elle ne s'est encore esté due ſur ce ſujet, & qui-
conque l'a voulu cōprendre sous la Precautiō, s'est grande-
mēt deceu; Autre chose est de preuenir vne maladie menas-
sante, & par vn ordre de viure & de medicamēs destourner sa
malice; ou alōger la vie à vne petite & delicate cōplection;
ou retenir la vigueur de l'humide radical, à vne robuste na-
ture par dela sa portee, & luy donner en fin pour Epitaphe
ce distic du vieux temps.

*Bongrē Dieu, mal-grē Nature,
J'ay vescu cent ans, outre mesure.*

ainsi qu'il est graué sur vn tombeau dedans le petit cloistre
des Cordeliers de Laon. Car tels effects ne dependent de la
Precaution, qui n'a pour but que le diuertissement des ma-
ladies.

Or à cette troisieme intention de la Medecine, les Plan-
tes sont autant ou plus necessaires pour son effect, que pour
la Curatiue & Deffenſiue. D'elles Medee composa le bain
qui rajeunit le decrepit Aeson; & vn vieil chenu en renou-
uela son poil & ses dents, puis eut pour Epitaphe,

*Cy gist qui de chenu & tres-vieil esdenté,
Renouuela son poil, ses dents, & sa santé,
Et puis ayant vescu deux siecles sans soucy,*

Rendit son ame à Dieu, son corps repose icy.

L'histoire rapporte que c'estoit de l'Elebore noir dont ce bon-homme vsoit souuent. Il s'en est rencontré vn autre en 1600. sur les monts de Sauoye, qui s'en seruoit aussi heureusement. Cette Plante n'est pas seule, plusieurs autres ont de semblables & de plus excellentes vertus pour ce dessein de la saine & longue vie, que nostre negligence nous desrôbe.

Quelles soient puissantes iusques à ce poinct, nos peres l'ont essayé, & la raison fondée en l'experience commencée dès la Creation du Monde le confirme, le long aage de plusieurs qui les ont pratiquées en est la preuue. Chyron, Pythagoras, Aristote, Theophraste, Zoroastes, Democrites, Xenophon, Amphiloche, Bion, Athenæ, Aristomache, Agathocles, Diodorus, Epigenes, Euagoras, Praxagoras, Crateuas, Erasistrate, Herophile, Hyppocrates, Dioscoride Galien, Pline, & autres du vieux temps, sans les Princes & les Roys, dont encores quelqu'vnes portent le nom, les ont grandement prisees, & ont esté suiuis par ceux cy de nos siècles. Fusch, Mathiole, Monard, Lobele, Dodonce, Pena, Cordus, Durád, Tragus, Leonicer, Turnicer, Clusius, Gesner, Dalechamps, & autres tres-curieux de leurs descouvertes, lesquels ont tant estimé les Plantes, qu'ils les ont preferees aux mineraux, & ce avec tres-bonne raison. Car ayant remarqué que nos corps auoient liaison & rapport à tout ce que contiét ce globe terrestre, ils ont obserué, que communément ils estoient plus violemment ou plus insensiblement alterez de l'usage des mineraux, que des vegetaux; ceux-la estans extremes au regne animal, & ceux cy comme au milieu. D'où ils ont puisé la raison, qu'il estoit plus expedient de se seruir des prochains, pour plus seurement rencontrer ce que l'on cherche; que de se mettre au hazard de faillir avec les eslongnez. L'estomac de l'homme ne peut

alterer les mineraux, & quelque preparation que l'on leur donne, l'vsage en est tousiours suspect. Cela n'est pas ainsi de la plus grande part des vegetaux, lesquels il altere & digere; les conuertissant en la nourriture de son espee. Et les Plantes trop reuesches à la complection, qui l'affectent & le blessent; avec vn peu d'Art elles luy sont renduës faciles, & les conuertit au bien de tout le sujet; mesme les plus malicieuses reçoient correction; de la sorte l'Oppion & l'Euphorbe, voire plusieurs autres sont renduës salutaires.

Je sçay bien que nombre d'Artistes se sont efforcez de tirer quelque chose de tres-excellent de l'or, pour la saine & longue vie, & de reduire en liqueur, la pluyë de la fille d'Achrise: mais iusques à maintenant, nous n'auons point veu ces merueilles. Il n'en va pas de mesme des Plantes, de leur tout ou de leurs parties, nous tirons de tres-precieux remedes; la condition animale en est soulagee, la santé conseruee & sa vie alongee, & d'elles nous receuons mille fois plus de douces commoditez, que de tout le reste des indiuidus de la Nature ensemble.

Cela conneu de nos Deuanciers, ils se sont efforcez d'en descouurir les vertus, & d'en prendre vn assureé vsage; nous estalant à leur possible les tresors des Plantes, pour en recueillir les richesses de la saine & longue vie. Mais toutes leurs laborieuses inuentions ne sont paruenuës iusques à nous: le Ciel n'a permis que la meilleure part des auis de leurs descouuertes soient tombez en nos mains, l'iniure des temps, la viciscitude des siecles, & la negligence de ceux qui les deuoient conseruer, l'a voulu ainsi; encores ce peu qui nous reste est si mal prattiqué, que ce n'est plus qu'vn ombre de ce que les vieux peres enseignoient; on ne sçait plus où sont les Plantes tant efficacieuës que nous descriuēt Theophraste, Pline & Dioscoride. Car les nouueaux lais-

8
fant leurs vertus spécifiques, ils se font seulement adressez aux qualitez premieres & secondes, suivant vne methode qui ne respond pas à ses promesses & qu'ils n'entendēt trop bien: s'estans imaginez que leur superficielle connoissance estoit suffisante pour ranger aux loix de leur conception les innombrables ouurages de la Nature.

Car ces glorieux esprits, posant le plus beau de la science en la cajolerie, & le tout à la premiere rencontre des choses, n'ont sceu donner plus grande estendue à leur Doctrine, ny autre fondement à leur Art, que des premieres & secondes qualitez, voulant descouvrir les premieres par les secondes, & celles-cy par les sens du goust & de l'odorat: voire n'ont pas honte d'asseurer qu'il n'y a point d'autre Nature en l'univers que le Temperamēt, ny encores de plus leur moyen de pratiquer la Medecine, que par la Philosophie des qualitez qu'ils nomment effectrices. Chrestiens qu'ils se disent, ils ont negligé de lire es saints Cahiers, comme la Nature (j'enrēds le premier ouurage Diuin apres les Anges) est bien au delà de ce qu'ils en cognoissent, & traueille avec bien d'autres instruments que les qualitez effectices. Aussi contredisant à eux mesmes, apres vn long essay des vertus Laxatiues, Alexitaires, & Venimeuses des Plantes, recognoissant les deux premieres pour les principales en l'Art, sont forcez d'aduouier que telles proprietēz ne respondent à leur methode qualitatiue, en ne releuāt des qualitez manifestes, ains de la proprietē de toute la substance, nōmant ainsi les vertus spécifiques, & les proprietēz qui procedent des formes.

Mais nous qui escoutons le Sage disputant depuis le Cedre iusques au Liban, iusqu'à l'Hyssope croissant à la paroy; non des premieres & secondes qualitez (bien qu'elles soient vtilēs selon leur condition, & que nous ne negligions pas) non au point des proprietēz spécifiques,
desquelles

desquelles il entend nous instruire. Passans outre ces simples imaginations, nous reprenons les erres de nos majeurs; nous redressons nostre methode sur l'experience, & r'appellons les obseruations des premiers esprouuans avec eux. Que le Stœcas, la Marjolaine, la Betoine, & le Rosmarin sont remedes aux affections du Cerueau, le Guy de chefne & le Piuoine à l'Epilepsie; l'Eufraise, le Fenouil, & la grande Chelidoine à l'Oeil, le Pasdane, & la petite Piloselle au Poulmō, le Saffran au Cœur, la Chicoree & l'Aigremoine au Foye; la Ciguë, le Cresson, & la Berle à la Ratte, l'Alkekange & la Morelle aux Reins, & à la Vessie, la Valerienne foemelle, l'Armoise, l'Espargoutte & la Sabine à la Matrice, la Sauge de bois, & la petite Centauree aux fieures putrides, le Geneure aux vices du cuir, la grande Esclaire à la iaunisse, l'un & l'autre Sanicle & le Fraisiier aux Cancers, la Veronique aux vlceres puantes & sales, le Millepertuis aux playes, & aux tressaillemens des petits enfans, l'Iue musquee aux iointures. la Sauge, & la Lauade aux nerfs, la grāde Scrophulaire aux tumeurs glāduleuses, & la Scorzonere aux venins de la peste & des Viperes. Car par tels effets nous apperceuōs que chaque Plante cōtient vne vertu qui regarde, ou vne partie du corps pour la fortifier, ou quelque maladie de cette partie pour la guerir, ne despédant des qualitez elemētaires seulement, ains encore de la propriété spécifique trespuissante.

Maintes maladies sont delaissees pour incurables qui pourroient receuoir guerison, si ces vertus influant comme des Astres estoient cogneuës & appliquees à leur obiect; & si l'experience qui seule nous peut asseurer de telles proprietéz, estoit en son lustre. Car quoy qu'elle soit perilleuse, c'est neantmoins l'unic & plus seur chemin d'y arriuer, la raison de l'vsage des remedes ne viēt que d'elle, & la suit. Que les plus entendus disent tant qu'il leur plai-

ra que la science la doit deuancer, cela est vray pour ce qui est cogneu, pourueu aussi qu'il ait esté bien rencontré par les premieres mains, empeschees à sa recherche: autrement c'est vne faulſe opinion, deceuant les paresseux, & ceux qui craignent de souiller le bout de leurs doigts à l'ouurage. Car asseurément il n'y a aucune science certaine sans experience. Il a esté necessaire d'essayer auant qu'asseurer, les edifices de l'Art se sont esleuez sur ces fondemens, & les maximes en ont leur origine, plusieurs euenemens obseruez pour mesmes respects ont donné l'estre aux Aphorismes, & de leurs meditations les principes ont esté tissus, qui ne voudroit aduouër tel progrès, ne s'opposeroit moins à la verité que qui affirmeroit que le feu n'est pas chaud.

Pour auoir negligé cette Maistresse des choses, soit croyant que tout fust descouuert, ou apprehédant le trauail; les Sciences sont demeurees dedans leur enfance, & les Disciplines imparfaites. Depuis le temps d'Hypocrates iusques à maintenant la science de Medecine a esté plus demonſtree qu'eslabouree, & plus eslabouree qu'amplifiée: ce que l'on a escrit depuis luy & Galien a plustost esté vn circuit de redites que quelque chose de nouveau. Tous les subtils ergotismes faits pour l'appuyer n'ont auancé son prix ny rien adiousté à ses preceptes, au moins qui merite l'estimer. Ce n'est pas qu'elle ait receu la derniere main, Il y a plus à faire qu'il n'y en a de commencé: Que l'on l'examine par la reigle d'Or, de Tout, & de Nul, le vray niueau de toutes les Doctrines, elle n'a point son estenduë en elle, au contraire ses maximes les plus vniuerselles reçoient exception. Toutes les maladies sont guerissables par leurs contraires assurent les Maistres; la Lepre, la Goutte, l'Hydropisie, & l'Epilepsie, sont pourtant incurables: voire de bien moindres traînent malgré les superbes Medecins & les glorieux Barbiers, les hommes au

tombeau: neantmoins ils se ventent d'en cognoistre les causes. S'il est ainsi, & que l'Art puisse enseigner leurs contraires sans experiēce, pourquoy faut-il qu'un Lepreux, au rapport de Galien, ait esté guery par hazard, & que pour satisfaire aux promesses de l'Art, le remede ne soit pas dedans la pratique? Pourquoy plusieurs villageois par l'usage de quelques Plantes, allegent-ils les Goutteux, guerissent-ils l'Epilepsie, & desseichent l'Hydropisie, que les plus suffisans Medecins ignorent & blasment? que cela n'est-il dedans leur Art, s'ils sçauent tout, & si les causes de toutes choses leur sont tant apparentes, comme ils se ventent? car le plus chetif se le promet. Pourquoy assuret-ils que tout ce qui est amer est chaud, & que la Ciguë, la Hioschiame, & l'Oppion amers, voire ce dernier tres-amer, soient froids, & que de leur froideur ils tuent, selon leur croyance? les sciences sont-elles vraies qui ont de telles contrarietez?

Ces euenemens regardez d'un œil humain, & confidez d'une ame pure, ne forceront-ils pas de cōfesser, que tel Art est imparfaict, ce qu'il enseigne incertain, que ses effects ne respondent ny à l'attente, ny à ses promesses, ny à ses reigles & maximes, & qu'il y faut proceder d'autre sorte: En un mot, que l'Experience, Maistresse des Arts, & le seul fondement des sciences, qui met en euidēce toutes choses, & sans laquelle tout est conjectural & incertain, est tres-necessaire pour la perfection. C'est l'aduis du Docte Apostre; Esprouuez (dit-il) toutes choses, & retenez ce qui est bon. Peut-on faillir apres un tel oracle?

Mais pour embrasser un si bon enseignement, il est besoin de bonnes ames, d'esprits vigilans, & de courages infatigables; ce que tous les siecles n'ont pas tousiours fourny. Les hommes se sont lassez de bonne heure, & sont demeurez aux premiers essais, soit par faineantise, ou croyant que

toute la verité du bien fut cogneuë: ils n'ont pas continué d'aage en aage les recherches qui pouuoient accroistre les descouuertes. Au contraire, dès que les premiers & les plus hardis commencerent à sortir de la lourdisse de leur naissance, les suiuaus estonnez des premieres attaintes qu'ils auoiēt donné aux sciences, n'ont osé passer plus outre: ils se sont seulement amusez à contempler ces descouuertes, à expliquer leurs aduis où ils leurs paroissoiēt obscurs, & à les confilier où ils se contredisent, leur faisant quelque fois dire des choses auxquelles ils n'ont jamais pensé: Que s'ils eussent eu pareil courage que leurs deuāciers, ils ne se feussent arrestez là, ils n'eussent si laschement borné leur science par l'imparfaicte cognoissance de leurs peres, ny ne se feussent amusez à retracer les chemins si battus de leurs deuanciers. Plustost d'une vigoureuse prudence ils eussent jetté l'œil du corps & de la pensée dedans le sein de la Nature, leurs mains y eussent fouillé, pour y descouurir les autres beautez & bōtez qu'elle y recele. Et nous, faits sages à leur exemple, nous ne commettrions de pareilles fautes, nous assujettissant si opiniaistrement à la seruitude de leurs iugemens, mesme au preiudice de nostre propre gloire, cōme si c'estoit vne iuste Religion de se tenir sans oser passer plus outre à leurs premieres descouuertes: Quelle foiblesse! c'est plustost vne timide superstition qui esteint la vigueur de nos courages, corrompt la bonté de nos pensées, & rebouche la plus viue pointe de nos esprits. Voire c'est vn sot respect, qui violēte nostre raison, & luy oste la douce liberté, pour l'assujettir à la tyrannie de cette loy trop absoluë, que nous imposons sur nous, de l'autorité de nos deuanciers: de mesme que s'ils n'auoient esté hommes, & qu'ils n'eussent peu faillir. Il le faut aduouër, cette trop grande submission plante en nos cœurs la nonchalance, apesantit nos mains au travail, & entretiēt le mon-

de en vne crasse ignorance, de laquelle nous ne nous pou-
 uons desuelopper: mesme l'on en est arriué iusques à cette
 maladie de l'esprit, de n'oser douter des opinions conceuës
 en l'enfance du Monde: & qui voudroit estaller quelque
 chose de nouveau pour les sciences, quoy qu'elle fust ap-
 puyée de raison & d'experience (les plus solides supposts de
 la verité) elle ne pourroit estre receuë, les idolastres de ces
 vieilles opinions crieroyent & croiroient que l'on violeroit
 les tombeaux de leurs peres. Erreur sans pareille! voire er-
 reur d'aveuglement, qui ne leur permet de considerer que
 si ceux dont ils adorent les cendres auoient fait de mesme,
 ils ne possederoient d'eux ce qu'ils prisent tant: Sans cette
 maladiue opinion ils sçauroient que l'homme vieillissant
 assagit, que la sciéce se digere en sa pensée, & se r'affine par
 sa main, que le temps & l'experience cōtinuelle accroissent
 de moment à autre ses perfections, & encore qu'il y ait vne
 continuelle viciscitude és choses de ce Monde, que les bon-
 nes se cachent par siecles, & puis reuiennent à paroistre
 comme nouuelles, que cela n'empesche leur progres d'a-
 melioration. Car il est pour constant que nous tenons que
 les esprits du premier aage du monde ont esté rudes & de
 petite inuention, que vieillissant ils se sont polis en experi-
 mentant, & se sont faits plus iudicieux. Que s'ils ont esté
 plus vifs & plus hardis, voire plus ingenieux au secōd qu'au
 premier, y a-t-il pas pareille raison du troisieme au qua-
 trieme, & de celuy où nous sommes au leur? La Nature est
 en vn perpetuel cours, elle ne reposera jamais qu'en sa ple-
 nitude où elle tire, meliorant de temps en temps les inuen-
 tions. Et puis il faut asseurément croire que la prouidence
 qui nous gouuerne proportionnant les agēs aux causes pour
 les effects, n'a pas estendu iusqu'à nous la duree du monde,
 & multiplié les siecles, pour estre oyfifs & pour n'accroi-

estre le talent de nos ames à de plus excellentes rencontres, & à de plus solides experiences que les premieres. Et comme la hardiesse de nos Matelots a descouvert qu' Aristote, le Dieu de l'Escole, s'estoit lourdement trompé, d'estimer que la terre fust inhabitee entre les deux Tropiques, pour l'excessiue chaleur qu'il croyoit y regner: Ainsi plusieurs bons esprits peuuent trouuer à redire au reste de ses pensées, & pourroient à iuste raison les refuter, si le Monde enforcé de sa Doctrinne le vouloit souffrir. Ainsi dis-je les Artistes de nostre aage ouourageant par le feu, assurent auoir rencontré vne plus seure dissection des corps que les deuâciers: par son moyen ils monstrent sensiblement que tous les corps naturels composez se diuisent en cinq substances differentes, assez simples, & dissemblables de celles que nous nommons les quatre Elemens. Ce que Platon, Aristote & les autres qui se sont renfermez dedans leurs opinions n'ont pas descouvert: Ce qu'Hypocrates & Galien, le curieux Anatomiste de la Nature, & ceux encore qui croient qu'ils ayent tout sçeu, ont ignoré, voire que ceux qui s'y arrestent par scrupule de trop sçauoir ne cognoistront jamais. A l'aduenture si ces vieux Docteurs eussent cogneu ces choses comme nous, & ce qui s'est descouvert depuis leur aage, eussent ils changé leurs preceptes & donné autre ordre à leurs aduis. Il ne faut pas pèser qu'hardis qu'ils ont esté, que s'ils se fussent rencontrés en ce siecle qu'ils fussent demeurez timides cōme nous, & qu'ils n'eussent examiné par les nouuelles descouvertes les vieilles, comme il est iuste. Car il est plus seant de les taster avec la raison & l'experience, que de les croire aueuglement, voire opiniastrément: autrement que sert cette belle sentéce; Plus amy de la Verité que du Maistre, & ne la suivre pas: neantmoins nous demeurons dedans cet assoupissement.

Ores desirant surmonter cette nonchalance, encouragé par le desir de profiter au public, l'ay proposé la recherche des Vegetaux, & la descouuerte de la vertu des Plantes: A quoy seruira la culture du Iardin Royal des Plantes Medicales, pour lequel vous estes tres-humblemēt supplié, Monseigneur, de fauoriser l'entreprise. Vous sçauiez que la vie saine & longue est le propre bien des grandes ames, quelles font les fonctions belles & saines és corps sains, que l'Art qui la peut moyenner est imparfaict, ses outils & son estoffe mesconnus, & qu'il est necessaire de releuer les parties pour redresser le tout: ce que vous iugerez impossible sans les fruiçts des parterres que je propose. Des-jà le Roy a accordé le Iardin & donné la Sur-intendâce à Monsieur Herroard son premier Medecin, je suis nommé par luy à sa Majesté pour en auoir la charge & le gouuernement. Il ne reste plus que les deniers, pour l'achat de la place, qui doit estre de vingt cinq arpents & plus: Pour sa closture & bastimens, pour creuser les viuiers, esleuer vne mōtagne de trois à quatre arpens d'assiette, & de huit à neuf toises de haut, afin d'y planter les herbes, cherissant les lieux esleuez: Dresser ses parterres & pour l'achat des Plantes: ensemble pour l'entretien de douze hommes, six desquels seront à la campagne & aux Prouinces esloignées pour faire les recherches, tant des Plantes sauuages que des domestiques, & les six autres à sa culture ordinaire.


Ie propose vn grand lieu, encore est-il petit pour le dessein: car ie ne desire pas seulement tenir des Plantes singulieres pour l'apprentissage, Mais en multitude pour l'vsage, afin qu'à toutes occurrēces, l'on y puisse auoir recours; que par son moyen la Medecine soit illustree & bien pratiquee, & que les Ministres d'un Art si digne n'ayent plus d'excuse pour cacher leur negligence.


Je l'implore, Monseigneur, en cette charitable & vtile necessité vostre faueur, les deniers que je demande pour l'ou-
 urage ne sont point dedans les coffres de sa Majesté ; ny ne
 les pretendz tirer de son Espargne, ils sont extra-ordinaires,
 & non pourtant de sorte qu'ils soient à la foule du peuple,
 vous le connoistrez s'il vous plaist par les aduis que j'en dō-
 neray au Conseil. Estant ainsi, Monseigneur, appuyez cer-
 te louable entreprise de vostre credit, faites qu'en ses parter-
 res il sy remarque vne Cardinale, aussi bien qu'aux Theses
 des Bacheliers en Medecine : Et que la posterité sçache,
 qu'un tres-reuerend & tres-illustre Cardinal de Richelieu,
 luy a procuré le riche-lieu des thresors de la santé & de la
 longue vie, & que moy remportant l'effet de ma tres-hum-
 ble priere; je sois obligé toute la duree de mes iours à prier
 Dieu pour vostre prosperité, santé & longue vie, m'estant
 deuoué,

MONSEIGNEVR,

Vostre tres-humble & tres-
 obeyssant seruiteur.

GVY DE LA BROSSÉ.







1762
894

8

4

RÉS



